

Mbanjnazvang:

Yiengh Gyaеundeі Vunzmbanj Angq

诗情画意那望屯

Hoz Yilongz tugl

Gingj haemh aenmbanj gyaеundeі raеuh.



▲ Yiengh moq aenmbanj caen gyaеundeі.



▲ Vunzmbanj comz naengh yawj yienjheiq.



▲ Ndaw Miuhgoekraemx hoenzyieng oenqngauq.



▲ Aen siengqdeu goeng-vuengz Loegvet ndaw dienh.

Haujlai vunz cungj rox Namzningz—Vujmingz Goengloh duenh Ganhhih miz aen mbanj gyaеundeі ndeu heuhguh Mbanjnazvang, dwg Vujmingz Gih Ganhhih Cin Dazdung Cunh aen mbanj ndeu, gizde miz aen fai hung ndeu heuh Nazvangz Suijgu caeuq goengq bya ndeu heuh Byalouzloeg, dakdaengh aen Mbanjnazvang ciengz hau vax nding, gofaex raemhrwd neix engq gyaеundeі engq yinx vunz.

Mbanjnazvang bya heu raemx saw, gingjaek gyaеundeі lumj veh. Byaij haeuj ndaw mbanj, yiengh mbanj gyaеundeі yinx vunz, song henz roenmbanj gofaex raemhrwd, luengqhongh seuqcingh, gij ranzlaeuz moq dep raemx hwnjguh haenx, baizle yinzrwd, gvangqyub rongh-cangx; diuz roensuijniz hopngomx aenmbanj haenx ngutngeuj iet bae gyaе, aen suiigu henz mbanj aenfai sangloet mienhraemx gvangqmiengx caemdingh, hawj vunz simhaenz. Gizneix miz raemx lai, gwnz bo miz aen “Miuhgoekraemx” ndeu, dwg gizdieg beixnuengx Bouxcuengh Dazdung Cunh caeuq benq Ganhhih baiqcaeq ndeu. Aen miuh gaeuqgeq neix ndaej heuhguh “Miuhgoekraemx” dwg aenvih aende guh youq

giz goekraemx Dahgojli Namzningz, caiqlij bakdah Dahgojli Namzningz couhwdg dieggaeuq ciuhgeq Senhva Cin Namzningz, dwg goek vwnzva caeuq goek caizfouq Namzningz. Bi 2010, ndaej gij cienzngaenz gaep baihgwnz yiengh singzmbanj cunghab cingceih gunghcwnz bangbouj, ndaw mbanj gag comz ngaenz 3.1 fanh maenz, guhbaenz hong yiengh mbanj cingceih, guh ndaej gvangcangz, daizheiq, lanzgiuzcangz doenghgij dieg hozdung neix, aenmbanj bienq ndaej moqsag lwenqda. Bi 2011 nienzdae, ndaw yienh bang aen mbanj neix yinxhaeuq Ciuhaucuz Cizdonz Gunghswah haifat lungzsanv viuhuz swnghdaiyenz lijyouz hanghmoeg, gyonjgyoeb roengzngaenz 5 ik maenz, daw ranghdieg Mbanjnazvang guhbaenz dieg gyoebcomz lijyouz youqndwi ciengxndang comz miz bya heu raemx saw doenghnaz ndeiyaewj, ndaej yawj gingj, youqndwi, ciengxndang, lienhdang, gvaq ngoenzgyaj, camgya guh, haihoih, youqninz lai cungj lai yiengh neix, caiqlij hawj gij yienghgaeuq swnghdai mbouj deng buqvaih, cunghab lijyouz fuzvu binjciz haemq ndei ndeu, hawj vunzmbanj “Ndaw mbanj rog yienh cungj ndaej

dajgoeng, saedceij vunzmbanj engq hoenghvuengh”. Geij bi gvaqdaeuq, vunzlai aen mbanj neix saedceij fatseng le mbwn fan deih boek bienqvaq, vunzmbanj baengh gij ndei depgyawj Namzningz, mbeilaux dwk byaij ok rog bya guh seng’eiq banh giyez, aeu aen uk coengmingz caeuq song faj fwngz gaenxgyaek de cauxguh saedceij moq bonjfaenh, ndaej baenz Vujmingz aen mbanj haemq fouqmiz ndawde aen ndeu.

Gyoengq vunzmbanj Mbanjnazvang baenz fouq le engq ndiepgyaеz ranzmbanj caeuq vwnzva minzcuz bonjfaenh, bingzciengz ndaejhoengq couh banh eu fwen yienjheiq caeuq dwk lanzgiuz doxdax doenghgij hozdung nauhyied neix. Moix bi liggaеuq ndwengouj ngeihsam dwg miuhhoih Miuhgoekraemx mizmingz neix, gij vunzmbanj ndaw mbanj nem mbanj gaenhlaz baenz fanh vunz cungj comz daengz naj miuh guh baiqcaeq caeuq gak cungj vwnzdij hozdung, foux saeceij foux lungz, mbauqsau doiq fwen, yienj heiq Begvah, lanzgiuz doxdax, ciengz dem ciengz, yiengh youh yiengh, nauhyied hoenghhwd, yinx haujlai hekyouz bae caenx ra angqyangz.



▲ Mbauqsau doiq fwen danq saedceij vuenyungz.



▲ Goengqbya henz mbanj caemh baenz gingj ndei.

◀ Aendien vuengz Loegvet.